

## Tempes dures per la festes... speron che les vae inant

*Chest an più che n event é stat descancelà o smendrà debel te val e zachei à dit che ence per la Festa da d'Istà podessa esser l'ultim an. I responsaboi ne à palesà i problemes e la soluzions possiboles*



*Endrezèr la festes doventa semper più senester per la gran burocrazia.*

L'è tempes dures per chi che endreza festes: zachei à jà lascià sù e etres se peissa se jir inant o no. La pruma a zeder l'è stat la Musega de Moena: amò l'an passà de november l president Dino Perut con n comunicat l'ha fat a saer che i aea dezidù de no se tor più sù l'endrez de la festa de Sèn Vile: «L'endrez de na festa coscita grana l'è doventà n empegn massa pesoch tant per i componenc de la Musega che per duc i voluntadives che con gran pascion à semper desmostrà soa vejnanza e desponibilità. No scone che ence a livel personal, duta la burocrazia per domanar le autorizazion e se tor sù la responsabilita desche president me à fat ge pissar sora.» Via per l'invern l'aministrazion de Comun de Moena à proà dapò più che n'outa a binèr ensema la sociazions de paisc per veder se l'era meso de endrezèr la festa, ma oramai l'era tèrt e a la fin l di de la sègra, ai 26 de jugn, l'è stat endrezà demò na marena te piazz.

N meis dò l'è stat la outa de Muncion: la sègra de Sènt'Ana chest an no la é stata endrezèda. Chiò un

di problemes l'è che l pra olache vegn metù l tendon l'è su na costa e percheche sie dut a norma ge vel fèr n pian de legn con n profesionist che se tol la responsabilita, e l'è n bon cost. «Chest an l'è ruà ence la neva che se aessa cognù prejentar duc i papieres de la segurezza en Provinzia – à dit l secretèr del comitat de endrez Marcello Gabrielli - cosci col president Franco Brunel de Boc aon dezidù de no far nia. Chest uton cognaron se binar, veder che che disc la jent e se l'è zachei che se sent de jir inant. De segur ence tel comitat n'è de chi che ge tegn n muie e i volessa seghitar, l problem maor l'è troar n president che azete de se tor sù la responsabilita e zachei che se cruzie de duta la part burocratica, domane de finanziament e dut l rest.»

### L problem no l'è i voluntadives

Duc i responsaboi de la festes disc che l problem no l'è troèr voluntadives che deide ti dis de l'event, ma chi che se tol sù l'empegn de endrezèr dut ti meis dant. E

dapò ben segur l'è ence la costion economica. La normes de segurezza e la complicazions semper maores fèsc smaorèr l cost, endèna che ciapèr contribuc da la istituzions che à sport n fort sostegn ti egn passé somea semper più senester.

Gigio Dantone, che da vèlch an l'è a cef de la Gran Festa da d'Istà, l smentesc la ousc che va stroz che chest fossa l'ultim an. «Noscia intenzion l'è chela de jir inant – l disc – ma ge vel veder co che muda la reforma del terzo setor e se sion bogn de jir inant demò con Studafèch e Crousc Biencia. Ge volessa esser bogn de tor ite vèlch auter grop, se meter ensema con sociazions desche la Mèscres e i Alpini, che i fèsc sie tendon ma peisse che ence per ic no sie sori. Se se fossa bogn de se cordèr e fèr adum la jissa micc. L lurier de endrez l'è lonch, ge vel se troèr n bon pecia de outes fora per l'an e temp se n pert giusta teis. L problem maor l'è la pèrt fiscala, normative che muda e che les é demò indicatives, no segures e chières. Cognaron se troèr e domanèr maor sostegn operatif ence da pèrt de l'aministrazion de Comun e de l'APT.»

### L'è ence esperienzes positives

L problem de troèr jent che se tole sù n empegn costant vegn palesà ence da Andrea Rizzi, che con chest an l fèsc endò pèrt del Comitad manifestazions de Vich. «Duc se tira ite le manie canche l'è da lurar, ma pec vel se tor sù l'empegn e la responsabilita de dut chel che stasc dò via. Con Entorn Vich oramai aon n endrez rodà, l'è na dejina de persone che se cruzia ogneuna de so ciamp. L'è na manifestazion picola che no à gran vadagn, me peisse che canche se trata de feste che dura più che na di, ence la gestion del

## Na festa ladina e identitèra

La festes che vegn fat te noscia valèdes se spartesc anter cheles fates per noscia jent e cheles che enveze se ouc soraldut ai ghesc. Ben segur la data sul calandèr à de chest vers na gran emportanza, ajache cheles che croda tel pien de la sajon cogn fèr i conts per forza con la prezenza turistica. Aboncont l'è evenc che fona sia reijes te la tradizion e che amò anchecondi é stac bogn de no perder sia pèrt più sciantiva e ladina. L'è dapò la festes che vegn conscridèdes «identitères», ajache les à na valuta leèda più diretamente con l'identità ladina. Tel Pian de politica linguistica del Comun general de Fascia jà da egn se reiona de la festes identitères. Una de chestes l'è de segur l'Aisciuda ladina, che enceben che no l'asse na tradizion n muie longia, ajache l'ha da pech passà via i 10 egn de vita, la é nasciuda proprio con l'obietif de esser na festa identitèra de duta Fascia, tolan ite la comunanza te sie desvalives setores. Dapò d'uton l'è la Festa del Rengraziament, che da passa 30 egn vegn endrezèda da l'Union di Ladins de Fascia, soula sociazion per l stravardament de la mendranza ladina che é recognosciuda da la Provinzia de Trent. Per aer festes identitères te ogne sajon l'era stat pissà al Carnascèr, n event che de segur caraterisea noscia val ence foradecà, ma che l'è senester da endrezèr e

programèr desche un soul event unitèr de val, magari spartì te più dis e con la colaborazion de sociazions e gropes de più paijes, ma bogn de se cordèr per fèr n event unich. Per chest per l'invern l'event conscridrà identitèr per duta la val l'è doventà la Sègra de Sènt'Ugèna na festa de fe e religion dedichèda a la Sènta patrona de duta Fascia. En ultima per l'istà a se vadagnèr la «candidatura» a event identitèr l'è stat la Gran Festa da d'Istà, ajache più che autres, enceben che la sie aprijèda e la se ouje ence ai foresc, la é stata bona te la gran defilèda de tor ite e tegnir ensema Museghes e gropes no demò de Fascia ma de duta la valèdes ladines.

Chest an en ocasion di 40 egn de chesta bela festa, ence l president de l'Union di Ladins de Fascia Fernando Brunel à uzà fora n apel ai ladins de duta la valèdes, acioche i tole pèrt e i fae sci che chesta festa posse doventèr semper de più n moment de enconter, olache i ladins pel se troèr, se rejonèr per ladin, se cognoscer micc, portèr sie bel guant da zacan. Con na letra (che troède a piata 2 de chest sfoi) l'ha envià duc i presidenc e i conseieres de la desvalives Unions de val e de l'Union Generela di Ladins de la Dolomites a tor pèrt a la defilèda portan la bandiera dai trei colores, per uzèr fora semper de più l valor identitèr de chesta bela festa. LG

vadagn e la spartijon anter i desvalives gropes che deida, posse esser n fator che influesc sul bon éjit.»

Positiva ence l'esperienza de la Festa ta Mont a Poza, nasciuda da passa 10 egn. L Comitad, vidà da Roberto Bertacco, l'è peà via con 7 persones e ti egn l n'ha tout ite de autres. «Per poder jir inant ge vel crear n grop che vae d'acort, canche se se bina e se laora ge vel ence se goder. Ben segur ence per noi l temp passa, la gran endesfida l'è esser bogn de tor ite i joegn, che i stenta a se tor responsabilita. Noi chest an aon ceri de se tor jù mingol de peis e per chest aon serà dant e ti egn

aon emparà a se spartir fora le robe da far. Dapò fin dal scomenz aon investi l vadagn per se comprar ite dute le art, massarie, gazebi e c.i. Ades aon n muie de roba che podon emprestar a le sociazion, al Comun e al Comitad Manifestazion. La gestion del magasin l'è n lurier de più fora per l'an, ma l ne permet de aer semper dut sot control e cosci ence l Comun e le sociazion ne dasc n gran didament tel besegn. Son otimist per i neves joegn che vegn ite, chest an endrezar l'è stat più sori e spere ben ence per l davegnir.»

Lucia Gross/Monica Cigolla